



REBOLUSYONARYO A DYARYO TI UMILI ITI AMIANAN-LAUD A LUZON

DANGADANG

ENERO 1, 2003



TAWEN 17



ESPESYAL NGA ISYU




IPASA NO MAB'SA

Ti Pannakaperdi ti Monumento ni Marcos

Pablaak ti
Chadli Molintas Command
NPA-Ilocos-Cordillera Region
Disyembre 29, 2002



Ti monumento ni Marcos idi



Ti monumento ni Marcos idia'y Taloy Sur, Tuba, Benguet ket monumento ti absoluto a kinaarogante ken kinalastog ti maysa a diktador. Naiyablat kadatayo nga umili a Pilipino 25 a tawen ti napalabasen. Maysa a gaddil iti daga nga ansestral a pagnanaedan dagiti umili nga Ibaloy. Maysa a nakabutbuteng a palagip kadagiti nakadakdakes a krimen da Marcos kadagiti umili. Maysa a makapasarua a banag a kinasapulan a maikkat.

Naikkat koma idi pay narippuog ti turay da Marcos babaen iti People Power idi 1986. Ngem awan ti politikal a pangngeddeng ti rehimen a Cory Aquino a mangtumba, ken nakarkaro pay, mangisaklang iti utek ti pannakapapatay iti asawa na ken ti dadduma pay a di mabilang a biktima ti diktadura a Marcos. Imbes, ti patakaran a sinurot na ket pannakikumplot kadagiti Marcos ken dagiti kroni da. Pareho a patakaran ti sinurot da Ramos, Estrada, ken Macapagal-Arroyo, iti gagar da a sublaten ti ginamgamrud da Marcos a kinabaknang. Ti agtultuloy a panagtalinaed ti monumento ni Marcos ket pananglalis iti hustisya ken panangtraydor iti pagayatan ti umili. Ti panagsubli da Marcos iti turay ket sakrilehiyo iti di mabilang a martir a limmaban ken nangibuwis iti biag da para iti nailian a wayawaya ken demokrasya kadagidi nasipngat a panawen ti martial law.

Makasugkaren ti umili a Pilipino iti agtultuloy a paspasaw da Marcos - ti nakakatkatawa a panangiyarig da iti bagí da kenni *Malakas* ken *Maganda*, ti puskol-rupa a panagpammarang da a nadaraan ti maharlika, dagiti peke a medalya ni Marcos iti gubat, ti makapaseggar a bangkay na a naka-freezer, dagiti agmauyong a sasao ni Imelda ken ipokrita a lua na tapno agpammarang nga inosente, dagiti kinaulbod kadagiti panid ti pakasaritaan a mangpadpadayaw kadagiti Marcos - amin dagitoy ket rumbeng a maibutaktak ken mapunas.

Ti panangperdi ti CPP-NPA iti monumento ni Marcos ket umuna ken simboliko pay laeng nga addang. Maysa a nalaad a palagip a saan

pay a nadusa dagiti Marcos kadagiti krimen da. Maysa a palagip a dagiti ramut a problema nga imperyalismo nga US, pyudalismo, ken burukrata kapitalismo a mangparparigat kadagiti umili ket saan pay a naparut. Kabaelan ti People Power a rippuogen ti maysa a kurakot ken bulok a rehimen, ngem ti laeng gubat ti umili ti makabael a naan-anáy a mangpampek ken mangdalous iti rugit ken kinaruker ditoy pagilian. Uray pay mabaliw-baliwan ti presidente no agtaltalinaed met ti daan a sistema, awan serbi na.

Narigat a tumbaen ti monumento ni Marcos. Kas karigat ti rebolusyonaryo a panangbalbaliw iti kagimongan agturong iti pudpudno a nailian a wayawaya ken demokrasya ti umili. Ngem uray dagiti “nabaked a republika” ket di-maliklikan a marippuog, gapu ta nakabatay iti narukop a pundasyon, nakabatay iti panangidadanes, panaggundaway, ken pananglabsing iti hustisya. Awan ti makalapped iti bileg ti umili ken ti rebolusyon.

Sapay koma ta napnuan rebolusyonaryo a tarigagay ken namnama ti Paskua dagiti amin nga umili a Pilipino a mangipatpateg iti wayawaya!

MARTIN MONTANA
Tagapagsarita, CMC



Ti Operasyon iti Panangpabettak iti Rebulto ni Marcos


Nabayagen a kiddaw dagiti nailian a minority nga Ibaloy ken dagiti biktima ti Martial Law ti panangdadael iti monumento ti diktador a ni Ferdinand Marcos idiai Taloy Sur, Tuba, Benguet. Idi Disyembre 29, 2002, naipatungpal ti dakkel a dadael iti monumento babaen iti espesyal nga operasyon ti dua a tim ti Chadli Molintas Command (CMC) a naggapu iti kaaw-awayan.

Ti rebulto ket intakder ni Marcos idi 1977 kas paset ti Marcos Park. Inagaw ti gobyerno ti 355 ektarya nga ansestral a daga ti 81 pamilya nga Ibaloy para iti Marcos highway ken *golf course* (pagay-ayaman dagiti babaknang iti bola a pangpang-uran da tapno maishoot iti abut iti daga). Saan pulos a nabayadan dagiti umili a naagawan iti daga.

Manmano ti turista a mapmapan iti rebulto. Ti parke ken *golf course* ket nabayagen a saan a mamenmentina. Narugit ti aglawlaw na ken abut-abut ti rebulto.

Nagprente dagiti kakadua iti CMC kas turista para iti G2 wenno panagsurbey ken panagala iti impormasyon iti rebulto ken aglawlaw na. Isu a saan a nakadlaw dagiti agbambantay iti rebulto ken agnanaed iti abay na.

Babaen iti sigud nga abut iti likod ti rebulto, nakaserrek da iti uneg ti rebulto ken rinukod da ti kangato, kapuskol, ken kadakkel dagiti poste, beam, ken ti mismo a rupa. Inala da met ti distansya dagiti balbalay, iskuelaan, ken highway manipud iti rebulto. Babaen ditoy, naamiris da nga awan ti matamaan no kas pangarigan mapabettak to ti rebulto. Inammo da met ti bilang ti



Ti drawing ti plano iti panangipakat iti dinamita iti uneg ti monumento ni Marcos.

tao, puesto, ken distansya ti kaasidegan nga istasyon ti polis.

Batay kadagiti naala da a datos, naiyaramid ti plano no sadino nga umannatop a maipakat dagiti eksplosibo, ania ti kaadu na, ken kasano a mapabettak (kitaen ti ladawan ti plano). Babaen iti naannad a kompyutasyon iti kinaadu ti mausar a pasabog, naisigurado nga awan ti matamaan kadagiti balbalay ken tao iti aglawlaw ti rebulto.

Iti tulong dagiti masa a sumupsuporta iti rebolusyon, naala dagiti kasapulan a bambanag para iti pannakaipatungpal ti operasyon - dinamita, lugan, balay, kdp.

Dimmanon iti 150 kilo a dinamita ti insagana dagiti kakadua para iti operasyon a panagpabettak. Iti pinal nga oryentasyon, natungtong no kasano a maipatungpal ti operasyon - ti tantya a kinabayag ti panangipakat kadagiti pasabog, oras ti panagpabettak, ruta iti panagatras kalpasan ti operasyon, ken alternatibo a plano no kas pangarigan ket adda tumaud a lapped wenno problema.

Nairut ti panagpatpatrolya ti pulis ken militar manipud pay bisperas ti Paskua gapu ta sim-mangpet ni Gloria Macapagal-Arroyo idia Baguio City. Ngem saan a nakalapped daytoy iti pannakaipatungpal ti plano. Alas-onse ti rabii idi naikasa ti operasyon. Maysa a tim ti nagserbi kas *look-out* iti tallo a pagserrekan iti lugar ken maysa a tim met ti nangipakat kadagiti eksplosibo.

Nakaadayon dagiti kakadua idi bintak ti rebulto iti banda nga 1:45 ti rabii. Interamente a naikkat dagiti mata, ken naperdi ti agong, bibig, ken lapayag ti rebulto. Awan ti natamaan wenno nadangran a masa. Nagballigi ti espesyal nga operasyon! 🇵🇭

Salsaluduan ti CPP ti Panangperdi ti NPA iti Monumento ni Marcos



*Pablaak ni Gregorio "Ka Roger" Rosal
Tagapagsarita ti CPP
Disyembre 30, 2002*

Salsasaluduan ti Partido Komunista ti Pilipinas ti NPA iti panangpabettak da iti nakagugura a rebulto daydi diktador a Ferdinand Marcos idia Tuba, Benguet.

Iti pablaak ni Gregorio "Ka Roger" Rosal, tagapagsarita ti CPP, kinuna na a ti nadadaelen a rebulto ni Marcos ket naitransporma manipud iti simbolo ti panangdayaw iti diktadura, iti simbolo itan ti nakapimpinan a kasasaad ti hustisya ken pangtao a karbengan iti Pilipinas.

Gapu iti pannakaperdi ti rebulto ni Marcos, kinuna ni Rosal a maragsakan unay ti umili a Pilipino.

Sinupiat ni Rosal ti agtultuloy a panagtali-naed dagiti patawid ti linteg militar ken awan pay nadusa kadagiti krimen da Marcos ken kroni da kontra kadagiti umili. Imbaga na iti partikular da Imelda Marcos, dagiti annak na a da Bongbong, Imee, ken Irene, ni Marcos kroni Danding Cojuangco, Roberto Benedicto, Henry Disini, ken dadduma pay a politiko ken dadakkel a kom-prador kapitalista.

"Ti pannakaperdi ti rebulto ket mangipak-pakita a saan pay a nagmawmaw ti napalalo nga unget ti umili iti pasista a diktadura ken iti kinainutil dagiti nagsasaruno a rehimen manipud Aquino agingga iti agdama a mang-dusa kadagiti Marcos ken kadagiti kangrunaan a buyot da," kinuna pay ni Rosal.

Imbaga na pay a dagiti biktima ti panaglab-sing iti pangtao a karbengan ket saan pay a nabayadan iti danyos perwisyo a rumbeng a maited kadakuada. Kuna ni Rosal a ti laeng rebolusyonaryo a tignayan ti makabalin a mangted iti hustisya kadagiti tao nga indadanis ken inabuso ti diktadura a Marcos.

Inyunay-unay ni Rosal nga epektibo pay laeng ti direktiba ti Komite Sentral ti CPP a maaresto ken mausig dagiti kangrunaan a nangi-daulo ken nagbenepisyo iti linteg militar.

"Adda kadagiti rebolusyonaryo a puersa ti panawen ken inisyatiba no kaano ken kasano a maipatungpal ti rebolusyonaryo nga hustisya," innayon pay ni Rosal.

Nadakamat ti napasamak kenni Rodolfo Aguinaldo, maysa a berdugo a PC colonel idi panawen ti diktadura a Marcos, ket nadusa babaen iti NPA idi 2001. Kuna ni Rosal a kas kenni Aguinaldo a napatay nupay metikoloso isuna maipanggep iti seguridad, dagiti Marcos ken dagiti buyot da ket sigurado a madanonan ti ima ti rebolusyonaryo a hustisya. 🇵🇭